

# Napparsimasunut siunnersortit pillugit Namminersorlutik nalunaarutaat

Tarnimikkut nappaatilinnik kiffaanngissusiiaaneq allatigullu pinngitsaaliisummik iliuuseqarneq pillugu Inatsisartut Inatsisaanni nr. 24-mi, 3. december 2012-imeersumi § 37 naapertorlugu aalajangersarneqarput:

## Kapitali 1

### *Napparsimasunut siunnersortinik atorfinitsitsineq*

§ 1. Kalaallit Nunaani Eqqartuussivimmi eqqartuussisup qinnuteqartut akornanni napparsimasunut siunnersortissanik atorfinitsitsissaaq.

*Imm. 2.* Najukkami tusagassiiuutitigut napparsimasunut siunnersortissanik pissarsiortoqassaaq. Ilinniagaqassuseq tunuliaqutaralugu suliat pillugit atuagassiani imal. allani sulisut imm. 3 naapertorlugu napparsimasunut siunnersortissatut piukkunnaatillit akornanni siunnersortissarsiornerup ilisimaneqalernissaanut qulakkeeriviusuni, aamma pissarsiortoqarsinnaavoq.

*Imm. 3.* Napparsimasunut siunnersortit qinnuteqartut akornanni siunnersortitut suliaasanut immikkut piukkunnaateqarsorisat, ilaatigut peqqinnissaqarfimmut, inunnik isumaginnittoqarfimmut, ilinniartoqarfinnullu attuumassutillit atorfinitsinneqassapput.

*Imm. 4.* Inuit Dronning Ingridip Napparsimavissuani atorfillit uninngasunut siunnersortinngorsinnaanngillat.

*Imm. 5.* Napparsimasunut siunnersortissatut atorfinitsinneqartut amerlassusissaat Kalaallit Nunaani Eqqartuussivimmi eqqartuussisumit pisariaqartitsineq tunngavigalugu aalajangerneqassaaq.

§ 2. Kalaallit Nunaani Eqqartuussivimmi eqqartuussisup napparsimasunut siunnersortinngortut aqqisa naqinneri siulliit tulleriiaarlugit aqqi, najugaat, oqarasuaataasa normui, qarasaasiakkut attaveqarfiat, suliffiat, suliffiannilu oqarasuaatip normua ilanngullugit nalunaarsussavai.

*Imm. 2.* Kalaallit Nunaani Eqqartuussivimmi eqqartuussisup nalunaarsukkat Dronning Ingridip Napparsimavissuani tarnimikkut nappaatilinnut immikkoortorta qarfanut nassiutissavai.

*Imm. 3.* Napparsimasunut siunnersortit najugaasa oqarasuaataasalu normuisa il.il. allannguutaat Dronning Ingridip Napparsimavissuani tarnimikkut nappaatilinnut immikkoortorta qarfimmi nalunaarsugaassapput. Napparsimasunut siunnersortinik nutaanik atorfinitsitsineri imal. napparsimasunut siunnersorti § 16, imm. 1 naapertorlugu nalunaarsuivimmit peerneqaqquppat, kiisalu napparsimasunut siunnersorti § 16, imm. 2 naapertorlugu siunnersortaajunnaarsinneqarpat, Kalaallit

Nunaani Eqqartuussivimmi eqqartuussisoq nalunaarsuivimmik attavigisassat pillugit paasissutissat allannguutaat ilanngullugit nutarterissaaq, imm. 2-milu periaaseq naapertorlugu nassiussissalluni.

## Kapitali 2

### *Napparsimasunut siunnersortinngortitsineq*

**§ 3.** Napparsimasut pinngitsaaliisummik napparsimmavimmut unitsinneqartut, pinngitsaaliisummik tigummigallarneqartut imal. pinngitsaaliisummik katsorsarneqartut, napparsimmavimmiit angerlareernermi pinngitsaaliisummik malittarineqartut, pinngitsaaliisummik aalaakkerneqartut, nukersorfigineqartut, napparsimasorlu illersorniarlugu pinngitsaaliisummik aalaakkerneqartut, immikkut nakkutigineqartut ataannartumik nal. ak. 24-t sinnerlugit sivilsussusillit, kiisalu inatsimmi § 26, imm. 1, nr. 2 naapertorlugu immikkoortortami matunik parnaarsinermi eqqugaasut tamarmik siunnersorteqartinneqassapput.

**§ 4.** Inatsisartut i natsisaanni § 1, imm. 2 naapertorlugu pinngitsaaliisummik napparsimmavimmut unitsitsinermi, peqqinnissaqarfup qitiusumik immikkoortortaani peqqissaavimmiluunniit pinngitsaaliisummik unitsitsineq ilanngullugu, pinngitsaaliisummillu tigummigallagassanngortitsinermi kiffaanngissusiiaanermut atatillugu siunnersorteqartitsisoqassaaq. Napparsimasoq napparsimmavimmut peqqissaavimmulluunniit piniariarpat, pinngitsaaliisummik tigummigallarneqarpat, pinngitsaaliisummik iliuuseqartoqarpat, napparsimasorlu piumassuserinngisaminik tigummineqarpat, siunnersorteqartitsisoqassaaq.

*Imm. 2.* Pinngitsaaliisummik iliuuseqarnerni allani pinngitsaaliisummik iliuuseqarnissaaq aalajangiunneqarpat, siunnersortinngortitsisoqassaaq.

**§ 5.** Dronning Ingridip Napparsimmavissuani tarnimikkut nappaatilinnut immikkoortortaqarfimmi peqqissaasup pigaartuusup, pisuni ataasiakkaani piaarnerpaamik pinngitsaaliisummik iliuuseqarfignittoqarneranik ilisimatitsineragut, siunnersortip tulluuttup siunnersortinngorneranik ilisimatinneratigut siunnersortinngortitsisoqassaaq. Napparsimasoq siusinnerusukkut uninnganermini siunnersorteqartinneqarsimappat, nalinginnaasumik siunnersortaasimasoq taanna siunnersortinngortinneqassaaq. Inatsisartut inatsisaanni § 1, imm. 2 naapertorlugu pinngitsaaliisummik unitsitsinermi, napparsimasup uninngavigigallagaata, piaarnerpaamik Dronning Ingridip Napparsimmavissuani tarnimikkut nappaatilinnut immikkoortortaqarfik, napparsimasumut siunnersortinngortitsisoqarsinnaaqqullugu, unitsitsineq pillugu ilisimatissavaa.

*Imm. 2.* Siunnersortinngortitsinnginnermi siunnersortinngortitsiniarnerup oqaaseqarfiginissaanut, napparsimasoq periarfissinneqassaaq.

*Imm. 3.* Napparsimasup nalunaarsuiffimmiittumik allamik siunnersorteqartinneqarnissani kissaatigippagu, Dronning Ingridip Napparsimmavissuani tarnimikkut nappaatilinnut immikkoortortaqarfimmi, sapinngisaq tamaat kissaatigineqartoq eqquutsinniarneqassaaq. Aalajangiineq kredsdommerimut allaffissornikkut aalajangiisuussumut naammagittaalliutigineqarsinnaavoq.

*Imm. 4.* Napparsimasup nalunarsuiffimmiinngitsumik siunnersorteqarnissani kissaatigippagu, siunnersortissatut tullinnguuttoq siunnersortinngortinneqarallassaaq, napparsimasup siunnersortissatut nammineq toqqagaata siunnersortinngortinneqarsinnaanissaa kredsdommerip aalajangiivigissavaa.

Napparsimasup siunnersortissamisut kissaatigisaa piumassuseqarpat, napparsimasumullu siunnersortissatut piukkunnaateqarpat, napparsimasup kissaataa eqquutsinneqassaaq.

**§ 6.** Napparsimasup ersarissumik kissaatigalugu oqaatiginngippagu, napparsimasunut siunnersortip pineqartup suliaa assigisaaluunniit, assersuutigalugu napparsimasumut pineqartumut kommunimi sullissisuunikkut, pineqartup napparsimasup soqutigisaasa pissusissamisoortumik isumaginissaannut piukkunnassusaanik nalornilersitsisumik pisoqarpat, napparsimasunut siunnersortissanut nalunaarsuiffimmi nalunaarsimasumik siunnersortinngortitsisoqarsinnaanngilaq.

**§ 7.** Nalinginnaasumik oqarasuaatikkut siunnersortinngortitsisoqartassaaq, tamatumali kingorna allaganngorlugu uppersarneqassalluni. Dronning Ingridip Napparsimmavissuani tarnimikkut nappaatilinnut immikkoortorta qarfimmi peqqissaasoq pigartuusoq napparsimasunut siunnersorti, assersuutigalugu aallarsimaneq, napparsimaneq assigisaaluunniit pissutiginigat pisinnaanerani qulakkeerisuussaaq.

*Imm. 2.* Napparsimasunut siunnersorti napparsimasumut allanut siunnersortinngortinneqareerni pissutigalugu siunnersortinngortinneqarni arnermut naaggaarsinnaavoq.

**§ 8.** Napparsimasumut siunnersortissanngortinneqareersup nalunaarsuiffimmiittumik allamik taarserneqarnissaa napparsimasup piumasarippagu, tamannalu tunngavissaqartutut nalilerneqarpat, Dronning Ingridip Napparsimmavissuani tarnimikkut nappaatilinnut immikkoortorta qarfimmi akuerineqassaaq. Tamanna akuersaarneqarsinnaanngippat immikkoortorta qumasaqaammut tamatumunga itigartitsippat, tamanna Kalaallit Nunaani Eqqartuussivimmi eqqartuussisumut naammagittaalliutigineqarsinnaavoq.

*Imm. 2.* Siunnersortissanngortinneqareersoq allamik siunnersortinngortut nalunaarsuiffianniinngitsumik taarserneqarnissaa napparsimasup piumasarippagu, napparsimasoq siunnersortaasorlu akerleriilersimappata, napparsimasullu kissaatigisaa akuerineqarsinnaanngippat. Kalaallit Nunaani Eqqartuussivimmi eqqartuussisoq aalajangiisuussaaq.

### **Kapitali 3**

#### *Napparsimasunut siunnersortip suliassai pisinnaatitaaffilu*

**§ 9.** Napparsimasunut siunnersorti sapinngisaa tamaat napparsimasoq isumasioqatigalugu iliuuseqartassaaq.

**§ 10.** Tarnimikkut nappaatilinnik sullissinermi kiffaanngissusiiaaneq allatigullu pinngitsaaliissummik iliuuseqarneq pillugu Inatsisartut Inatsisaanni § 32, imm. 2 naapertorlugu suliassat suliarineranni, napparsimasunut siunnersorti ilaatigut pinngitsaaliissutit siunnersuisoqartitsinermit patsisaasup pisariaqanngitsumik sivitsorneqannginnissaanut nakkutilliisuussaaq.

**§ 11.** Napparsimasup aningaasaqarnikkut inissisimanera pissutsillu allat inuttaanut namminermit tunngasut tarnimikkut nappaatilinnut immikkoortortami uninnganermut, katsorsartinermullu attuumassuteqanngitsut, napparsimasunut siunnersortip suliassaasa avataanniippat.

**§ 12.** Napparsimasumut siunnersortinngortup napparsimasoq piaarnerpaamik pulaassavaa attavigiuassallugulu. Napparsimasoq Dronning Ingridip Napparsimmavissuaniippat, siunnersortinngornerup kingorna nal. ak. 24-t qaangiutsinnagit napparsimasoq siullermik pulaarneqassaaq. Napparsimasoq sinerissami peqqinnissaqarfiup immikkoortuisa arlaanniikkallarpat, siunnersortinngornermiit nal. ak. 24-t qaangiutsinnagit oqarasuaatikkut attavigineqassaaq. Tamatuma kingorna sapinngisamik sapaatip akunneranut ataasiarluni pisariaqartitsinerlu naapertorlugu pulaarneqartassaaq.

*Imm. 2.* Napparsimasut uninngareernerup kingorna pinngitsaaliisummik malittarineqartussat, napparsimasoq angerlartinnagu pulaarneqassapput. Angerlareernermi attaveqatigiinneq aatsaat napparsimasup kissaatigippagu, taamaallaallu peqqinnissaqarfiup qarasaasiakkut attaveqaataasa atornerisigut pisassaaq. Napparsimasoq Nuummiippat, oqarasuaatikkut nalunaarasuartaatillu allat atorlugit attaveqatigiinnissaq napparsimasup kissaatigippagu, Dronning Ingridip Napparsimmavissuanut pulaarnermik taarserneqarsinnaavoq.

*Imm. 3.* Napparsimasup kissaataa naapertorlugu napparsimasunut siunnersortip pulaarnissaanik oqarasuaatikkulluunniit attaveqarnissamik qulakkeerinissaq, katsorsartiffimmi nakorsap akisussaaffigaa.

*Imm. 4.* Akeqanngitsumik akornuserneqaranilu nammineq takkunnikkut, allakkatigut oqarasuaatikkullu napparsimasup uninnganerani attaveqarsinnaaneq, napparsimasunut siunnersortip pisinnaatitaaffigaa.

**§ 13.** Ilisimasariaqagaq sunaluunniit suliassap illersorneqarsinnaasumik naammassineqarsinnaanissaanut pisariaqartoq, immikkoortortami sulisut napparsimasup siunnersortaanut ilisimatitsissutigissavaat. Nakorsamit napparsimasumut ilisimatitsissutaanngitsut taamatuttaaq napparsimasup siunnersortaanut ilisimatsitsissutaassanngillat.

*Imm. 2.* Napparsimasunut siunnersorti pinngitsaaliisummik iliuuseqarnernik nalunaarsuiffimmi, napparsimasumut siunnersortaaffissamut tunngasunik paasiniaanissamut pisinnaatitaavoq.

*Imm. 3.* Napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq naapertorlugu, napparsimasup nammineq pisinnaatitaaffigippagu, napparsimasorlu akuersippat, napparsimasumut siunnersorti napparsimasoq pillugu napparsimmaviup allattugaataasa imaanik paasiniaanissamut pisinnaatitaavortaaq.

**§ 14.** Napparsimasumut siunnersortaasoq pinerluttulerinermut inatsit malillugu akisussaatinneqarluni atorfinnut atatillugu napparsimasumut namminermut tunngasut paasisani pillugit nipangiussimasussaataavoq, uani peqqissuseq ilaatinneqarpoq.

## **Kapitali 4**

### *Siunnersortaajunnaarneq il.il.*

**§ 15.** Siunnersortaaneq pinngitsaaliisummik iliuuseqarnerup taamaatinneqarnera ilutigalugu atorunnaarsinneqassaaq. Napparsimasunut siunnersorti pinngitsaaliisummik taamaatitsineq pillugu Dronning Ingridip Napparsimmavissuani tarnimikkut nappaatilinnut immikkoortortaqaqfimmi peqqissaasumit pigaartuusumit nalunaarfigineqassaaq. Pinngitsaaliisummik iliuuseqarneq sivikitsoq napparsimasumullu siunnersorti suli pulaanngitsoq taamaatinneqarpat, siunnersortaaneq

nalunaarasuartaatikku attaveqareermermi imaluunniit pulaareermermi aatsaat atorunnaassaaq.

*Imm. 2.* Imm. 1-imi aalajangersagaq apeqqutaatinnagu napparsimasup maalaarutaanut aallartinneqareersumut imaluunniit pinngitsaaliissummik iliuuseqarnerup taamaatinneqarnerani aallartinneqartumut napparsimasumut siunnersorti ikiutissaaq.

*Imm. 3.* Siunnersortinngortinneqartoq § 8 naapertorlugu allamik taarserneqarpat, siunnersortaneq taamaatinneqassaartaaq.

**§ 16.** Napparsimasunut siunnersorti sukkulluunniit siunnersortinik nalunaarsuiffimmit peerneqaqqusinnaavoq. Nalunaarsuiffimmit peerneqaqqulluni kissaateqarneq Dronning Ingridip Napparsimmavissuani tarnimikkut nappaatilinnut immikkoortortaqaqfimmu, Kalaallit Nunaani Eqqartuussivimmi eqqartuussisumut tamatuminnga ilisimatitsisussamut, nalunaarutigineqassaaq.

*Imm. 2.* Napparsimasunut siunnersorti siunnersortit nalunaarsorsimaffianniittoq siunnersortitut pisussaaffimminik annertuumik sumiginnaappat, imaluunniit siunnersortaanissamut piukkunnaateqanngitsoq paasineqarpat, siunnersortaajunnaarsinneqassaaq.

Siunnersortaajunnaarsitsinermi pineqartoq nalunaarsuiffimmit peerneqassaaq. Napparsimasunut siunnersortit pisussaaffimminik sakkortuumik sumiginnaasut Dronning Ingridip Napparsimmavissuani tarnimikkut nappaatilinnut immikkoortortaqaqfimmu saaffiginnissutaassapput. Immikkoortortap suliaq piareersaareerlugu tusarniaassutigereerlugulu Kalaallit Nunaani Eqqartuussivimmi eqqartuussisumut tunniutissavaa oqaaseqaatinik peqarunik ilanngullugit.

*Imm. 3.* Imm. 2 naapertorlugu napparsimasunut siunnersortaajunnaarnissaa Kalaallit Nunaani Eqqartuussivimmi eqqartuussisumit aalajangiivigineqassaaq. Eqqartuussiviup aalajangiinera Dronning Ingridip Napparsimmavissuani tarnimikkut nappaatilinnut immikkoortortap napparsimasunut siunnersortimut ilisimatitsissutigissavaa.

*Imm. 4.* Imm. 1 imaluunniit imm. 2 naapertorlugu siunnersortitut nalunaarsuiffimmit peerneqarneq siunnersortinngortinneqaqqissinnaannginnermik kinguneqassaaq. Imm. 2 naapertorlugu nalunaarsuiffimmit peerneqarneq maannamut siunnersortaaffiit taamaatinneqarnerannik kinguneqassaartaaq.

*Imm. 5.* Napparsimasunut siunnersortit nalunaarsuiffimmi nalunaarsorneqarsimangitsut, imm. 2-mi piumasaqaatit naapertorlugit siunnersortaajunnaarsinneqarsinnaapput. Taamaattoqarnissaa Kalaallit Nunaani Eqqartuussivimmi eqqartuussisumit imm. 2-mi periusaasoq naapertorlugu aalajangiivigineqassaaq.

## **Kapitali 5**

### *Akissarsiat*

**§ 17.** Peqqissutsimut Naalakkersuisoqarfik napparsimasunut siunnersortinngortinneqartunut, napparsimasunut siunnersortit nalunaarsorsimaffianniittunut, napparsimasup pinngitsaaliissummik iliuuseqarfigineqarnerata qanoq sivilutiginera apeqqutaatillugu, akigititat uku naapertorlugit akissarsiaqartitsisuussaaq:

- 1) Pinngitsaaliinikkut iliuuseqarnerit ullut arfineq marluk angullugit sivilussusillit: 754 kr.
- 2) Pinngitsaaliinikkut iliuuseqarnerit ullut arfineq pingasuniit 30-t angullugit sivilussusillit: 1.131 kr.
- 3) Pinngitsaaliinikkut iliuuseqarnerit ullut 30-t sinnerlugit sivilussusillit: 1.508 kr. qaammatit pingajussaat

aallartikkaangat.

*Imm. 2. § 5, imm. 1, oqaaseqatigiit aappaat naapertorlugu arlaleriarluni napparsimasumut ataatsimut sivikitsumik siunnersortinngortitaanermi, siullermik siunnersortinngortinneqarnermiit siunnersortinngortinneqaqqinnerni tulluuttuni immikkut ittuni, siunnersortinngortinneqarnerni ataasiakkaani akissarsiat 377 koruuninut apparneqarsinnaapput.*

**§ 18.** Aningaasat § 17, imm. 1-imi 2-milu taaneqartut napparsimasumut siunnersortaanermi pulaartarnermut, maalaarutinik ikiuinnermut assigisaannullu aningaasartuutit saniatigut, siunnersortaanermi aningaasartuutinut, ilaatigut oqarasuaammik atuinnermut assigisaannullu matussutaassapput.

*Imm. 2. Immikkorluinnaq ittumik pisoqartillugu Peqqissutsimut Naalackersuisoqarfiup suliap qanoq annertutiginera apeqqutaatillugu § 17, imm. 1-imi taaneqartut amerlillugilluunniit ikilisinnaavai.*

## **Kapitali 6**

### *Atuutilersitsineq*

**§ 19.** Nalunaarut atuutilersinneqarpoq 1. september 2015.

*Imm. 2. Taamaasilluni namminersorlutik oqartussat nalunaarutaat nr. 19 decembarip 2-neersoq 2013 napparsimasunut siunnersortit pillugit atorunnaarsinneqarpoq*

*Namminersorlutik Oqartussat, ulloq 26. august 2015*

Doris Jakobsen

/

Lone Nukaaraq Møller

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalackersuisut

